

Jems Kumwimp Pas Mekia Akwapnámp Kar

Jems te Jisasomp nánae. Mao te Jerusalem mekamp sios mek yakápnap kourap arop taokeyakámp.

Jemso má pas Kristen kourap arop pirikimpea ankwap fi mek paokop napampor kumwimpon. Mao má pas kumwimp te Jisas sumpwia pok tenánko, 20 a, 30 yopwar niamp arake feki námpon.

Jems te Kwaromp kourap aropan kwapwe kare ninikaok paokop mwanap yénk naenámpria máma kar kumwi námpon. Tá Jems ankwap kar sénámp te, ‘Arop Jisasén mér námp mwar kwaporok yak naeane. Ankár kwapwe kare ninik méntér yak kun’rá sénámpon.

¹ Ono Jems ono Kwar ntia Jisas Krai Tokwae Karamp tére konamp aropono. Ono éntérsámpramp Israel fi yumo yumokuráp némp pwatea tukupea ankwapamp apárok yakápnapantá, yiráp por má pas má kumwiaka ‘Gude’rá sér rae.

Nkwakwe make kar kwatae korop námp te nomwan kárakáre sápnámp kar

² Ononamp arop fákáre, yumo te nkwakwe make touwe kwatae korop námpan kor, Am te fwap warákár mwanámp ankankrá ninik kipo.

³ Yumo te wae mérono: Nkwakwe make touwe yiráp méran mokop nap nke naeria korop námp te, am támao kárakáre sánk naerámpara, inkirman

námpritea kárákáre fek fokopeyakáp kipo. ✧ ⁴ Aeria maok, nkwakwe make touwe korop námpan kor, kárákáre fek yakáp napo maok, am taknap ninik kwapwe tokwae kari yak nánko, yumo te yae-párák yakápria, Kwaromp ninikan kor épérép mono, ponankor fwap pwi mwanapon. ✧

Arop ninik kour sámp naenámp kar

⁵ Yumo ou mekamp arop ankwap yonkwae kour mo námamp kwamp te, mao ankár Kwarén sénánko, Kwaro man fwap sánk naenámpmon. Kwar te ponankor aropan kápae kare ankank nénk konámpara, aropao man ‘Ankank sápaé’ ria kar toropwap napo te, mao yopor mo i konámpmon. ✧ ⁶ Aeno am arop te Kwarén mér kareria kar toropwap naenámpmon. Mao fwapia mér moriaka arakrá ninik naeane: ‘Kwar te onan fwap sámp kun ni, mokop kun?’rá ninik naeane. Tak niniknámpp arop te, solwara ouwiraó nánko, náre mwaek akwapránknámpp niampon. ✧ ⁷ Am taknámpp arop te Kwar Tokwaerao námwan ankank sánk naenámpmon mpwe ninik naeane, mono. ⁸ Am aropamp ninik te ankárank ninikaok saráp mono, kápae kare ninikria, mao apae naenámp tére te fwapia yonkwae kour fek tére mo i konámpmon. ✧

Ankankráp arop ntiaka ankank monámpp aropamp kar

⁹ Táte Kristen ankwap ankank mo námpp kwamp te, fwap warákár naenámpmon. Am te apae riteanápe, Kwaro nke námpp fek te ankankráp

✧ **1:3:** Ro 5:3-5; 1 Pi 4:13-14 ✧ **1:4:** Mt 5:48 ✧ **1:5:** 1 Kin 3:7,9-12; Mt 7:7 ✧ **1:6:** Ais 57:20 ✧ **1:8:** Lu 16:13; Je 4:8

aropria e tokwaeráp arop yak námpon. ✧ 10-11 Aeno Kwaro ankank kápaenámp Kristen aropamp ankankan kánanke kwataenorá ninik nánko te, warákár naenámp. Am te apae riteanápe, kápaé kare maniráp ankank koupoukour mwar kar nap te am fárákap te apwar fuao yámar tákap nánko, yonkwae konámpnám araknám am tére nap meknám sumpwi mwarea napon. ✧

Kwaro arop kwatae ninik fek warámpá akwap mo i konámp kar

¹² Arop nkwakwe make touwe korop nánko, inkirman nám ritea fokopeyak konámp te warákár kuno. Táte mao am kar ponankor wampwe kwaeria pwaránko te, Kwaro man yiki yak konap nopok am tak nám fek sánk naenámp. Kwar te arop ponankor man warákár tokwae napan ‘Nopok sánk nanamp’rá sérimpaok man kor takrá sánk naenámp. ✧

¹³ Táte arop ankwap man mokopon nkenenámp kwatae ninik korop nánko te, ‘Kwaro onan māmá ninik sáp námpono’rá ninik naeane. Am kwataenámp ninik te Kwarén nikir-sankorop mo, tá Kwar te aropan ‘Kwatae ninikae’rá sér mo i konámp. ✧ ¹⁴ Aeno nomoku nomp ninik ankákárankao maok, fárámprá érékép akwap konámp. Nomokuráp am ninik kwatae támao nomwan kákámánkariaka kwekárianánko, nomo am ninikaok tukup konámp. ¹⁵ Am ninik támao takrá akwapea, táráp yak nám niamp tokwaeaka,

✧ **1:9:** Jer 9:23-24; 2 Ko 6:10; Je 2:5 ✧ **1:10-11:** Lu 12:16-21; 1 Ti 6:17; 1 Pi 5:5 ✧ **1:12:** Dan 6:1-28; Lu 6:22-23; Je 5:11 ✧ **1:13:** 1 Ko 10:13; 1 Pi 2:11

yupuao táráp tank konámpnám্প taknám্প, kwatae nínikao kor akwapea tokwaeria sumpwi sámp-pap konámpon. ✧

¹⁶ Ononamp fákáre kare, yumo takria am kwatae nínik taki yakanoria pwate napo, yumwan poupweká pantáno. ¹⁷ Ankank kwaporok sánk konap nínik kwapwe kare, tá Kwaro sánk konám্প kwapwe kare ankank ponankor yámar meknám্প ék konámpon. Am te yámar mekamp ponankor wae yoroinám্প Naropwar Kwaro nompор sámp-kérép konámpon. Am Naropwar te náráp nínik pwarará, warko ankwap nínik sámp mo i konámpono. Mao te aropamp wunérirao koumounek yámar fek wunéri éritea, yámar kuk nánko wunéri fae konám্প niamp taknám্প mono. ✧ ¹⁸ Mao te námokuráp nínik fek nomp Naropwar yak námpon. Nomo maomp kar kare fek forokari námpon. Aenám্প te nomwan ponankor arop fi ntia nape firamp nae fi yakáp mwanapria yoroi námpon. ✧

Kwaromp kar wawiaka mántwaok tukup mwanám্প kar

¹⁹ Ononamp fákáre kare, yumo te ankár máamá ankankan fwapia mérenke: Yumo ponankor ankár kar wa mwaria koupour nánapria maok, yumo nopok koupour kar yopori kwapono. ²⁰ Am te apae riteanápe aropamp yopor yonkwae pwarám্প te arop nínik mek yae-párak kare nínik sámp-pap mo i konámpon. ✧ ²¹ Ae konámpara, yiráp nínik mek oumnám্প nínik, tá nkwakwe make

✧ **1:15:** Ro 6:23 ✧ **1:17:** 1 Jo 1:5 ✧ **1:18:** Jo 1:12-13; 1 Pi 1:23

✧ **1:20:** Snd 10:19; Sav 7:9; Mt 5:22

kwatae ninik te ankár ponankor nkwampok tirá épér kipo. Aeria maok, sánánkar porokwe fek yakápria, Kwaro yiráp ninik mek sánknámp karwaok paokop napo maok, am kar támao yiráp waemp warko warámp naenámpon. ☆

²² Aeno yumo sámpnap kar máte kwaporok wawi pwar kwapono. Ankár ampaok paokop kipo. Aeno yumo kwaporok wawi pwar nap te, yumoku támao kwekár napon. ☆ ²³⁻²⁴ Táte arop ankwap Kwaromp kar wa námpao, ampaok akwap mo námp te, wunéri kour meknámp námokuráp yimetáp wunéri nkeanámpao, paprá youmpria, yimetáp nke námp ník mo, pwar konap niamp taknámp napon. ²⁵ Aenapan maok, Kwaromp lo kwapwe kare te nomwan kwatae ninikao sámp-fákeyak námp mekamp éréképeanánko, amwar yakáp i konámp te, yae-párák kareno. Tá arop ankwap am lo fwapi nkea pwar mono, ampaokrá yarak nánko te, Kwaro maomp tére kwapwe kare pap naenámpon.

²⁶ Táte arop ankwapao arakrá ninik: “Ono te kwapwe kare Kristenara, Kwarén kare kar lotu i konampono.” Makrá sénámpao maok, námokuráp kar te fwapia poukwap mono, námokuráp ninik mek kwekár námpon. Aenámpara, maomp mér ntia maomp lotu námp te kwaporok párák táman námpon. ☆ ²⁷ Kristenamp ninik ankár kwapwe kareria, nomp Naropwar Kwaro nke námp fek yae-párák kare yakáp i konap te ará: Kweri tárápu, kae koumteouran warámpea yakápria maok, yae-wour i konapon. Tá ankwap te, nomo ankár

nomoku nomp paokop fwapi taokeyakáp nánko maok, mámá apár mekamp nkwakwe make ninik nomp ninik mek koroepa Kwaro nke námp fek oumi pap mo naenámpo. ☆

2

Ponankor aropan ankárankamp puri fek aropomp mwanámp kar

¹ Ononamp fákáre, yumo nomp Jisas Kraís Tokwae Karan mér nap te, mao te wae kwapweráp Tokwae Karono. Aenámpara, yumo e tokwaeráp aropan saráp yae-párákria, e moráp aropan younkwe sánk mwanape. ☆ ² Aeno arop ankárankao, ankank kwapwe kare yirírria pwarará, gol meráp yae topwe fek yirímpea yiráp lotu nap mek yoump nánko, tá ankank monámp aropao kor siot ankank kwatae yirimpria, mao kor lotu nap mek yoump nánko maok, ³ yumo arop siot ankank kwapwe kare moporinámp aropan yae-párákria sérrá, ‘Amo te sia fek mapek tankae’ ria pwarará maok, tá ankank monámp aropan sérrá, ‘Amo te tapek fokopeyakaerá sérrá, tá ‘Ono fokopeyak namp fek apárok mapek tankae’rá sér mwanape. ⁴ Am yumo taknap ninik te yiráp ankwapyaenámpén yiráp ninik fek yurukupia kwatae ninik napon. Yumo am tak nap te, arop kotnámp aropao kotrá kwatae ninik fek yurukup i konámp niamp napon. ☆

⁵ Onomp kémpiyae fárákap, yumo fwapia wawenke! Arop arop ponankor nke nap fek ankank monámp arop te, Kwaro man

☆ **1:27:** Ais 58:6-7 ☆ **2:1:** Ap 10:34; 1 Ti 5:21; Je 2:9 ☆ **2:4:** Jo 7:24

náráponorianánko, mao Kwarén mér nám̄p mér tokwaerao maniráp arop niampi yak nám̄pon. Arop man warákár napan, éréképeaka námokuráp arop firént pwar nanampri nám̄pon. Aenánko maok, am ankank monám̄p aropao kor, am mek mént yakáp mwanapri nám̄pon. ✧ ⁶ Aenámpan maok, yumo am ankank monap arop lotu nap mek korop napan pwarápae sánk konapon. Yumo te waeman mér napon, ankankráp arop te yumwan nkwakwe make sokororá paokopria, yumwan éréképá tukupea kot i konap te mér mo napon? ✧ ⁷ Kwaro yumwan Kraisomp e kwapwe kare ták-pap námpan maok, am ankankráp arop fákárrerao am eran wouroump konapono.

⁸ Nomp King Kwaro lo ankárank maomp Buk fek arakrá sérimpon, “Amo amokuráp pourouan warákár konapnám̄p taknám̄p arop ankwapan kor warákárampo.” Aeria maok, yumo am lo karwaok tukupria te, yae-párak kare ninik fek paokop mwanapon. ⁹ Aeno yumo arop ankwapan saráp kwapwe kare námprá ninikria, ankwapan te kwatae námprá ninik mwanape. Yumo am takria te, kwatae ninik napon. Yumo am tak nap te, am loao yumwan lo ták-sinaprá yénkép nám̄pon. ¹⁰ Aeno arop ankárankao lo ponankor mántwaokria maok, ankárankamp lo ták-pwar nám̄p te, mao lo ponankor ták-pwar nám̄pon. ¹¹ Nomo te wae mér nám̄pon, Kwar te arakrá sénám̄pon: “Yumo yupuráp arop, tá poumaropráp koumteou, yumo te kokopori kwapon.” Tá ankwap sénám̄p te: “Arop sámp-wouroump kwapon.” Aeno táte

✧ 2:5: Mt 5:3 ✧ 2:6: Ap 16:19

kokopor mo napao maok, arop ankárank sámp-wouroump nap te, am te amo wae lo kar kwe-pwar napon. ✧ ¹² Kwar te yumwan fwapia papnámpan loran yurukupia yiráp ninik yurukup naenámpnon. Aenámpara, yiráp ninik, yiráp kar ankár am loak tukup kip. ¹³ Aeno arop ankwapao ankwapan yonkwae touwe moianámpan te, man te Kwaro yurukuprá kot námp fek te man yonkwae touwe mo karenono. Aeno arop ankwapan aropomp i konámpan te, fwap kot kwe-pwar naenámpnon. ✧

Kwarén mérnámpan ntiaka téré kwapwenámpan kar

¹⁴ Ononámpan fákáre, arop ankwapao sérrá, ‘Ono Kraisen te waeman mér kare namp’rá sénámpan maok, mao kwapwe kare niniként téré mo námp te, maomp mér te kánanke kwataeno. Am take pourouráp mér te mokopia man warko warámpan naenámppanáp, mo karonono. ¹⁵ Aeno yumonap mekámpan arop ankárank, yupu ankárankao fir mo, waempyamao kor mo nángo, námpare nángo, ¹⁶ yumo ankwapao man sérrá, “Amo yae-párak yakria maok, akwapea amokuráp waempyam sámpea waráp pourouk woukwapria maok, fir amokurápan sámpea fárae.” Ae te yumo man fir nti waempyam sánk moria, kar mwar sénapo te, yiráp kar mwar am te mokopia man yaewour naenámpnon? ¹⁷ Am Kwarén mérnámpan ninikao kor tak námpni yak námpan. Kwapwe kare ninik mént yak mo námp te maomp mér te kwaporok yak námpan. ✧

✧ **2:11:** Kis 20:13-14 ✧ **2:13:** Mt 5:7; 6:14-15 ✧ **2:17:** Mt 25:41-45; 1 Jo 3:17

18 Aeno táte arop ankwapao sérrá, “Arop ankwap fárákap te mérrá yakáp napon. Tá ankwap fárákap te kwapwe kare ninik fek saráp tére napon.” Aerá sénapan maok, ono yumwan sérrá, ‘Yumo mér nap yéncép napao maok, kwapwe kare ninik mént yéncép mo nap te, nopok ono kuri yae-párák kare ninik fek tére konamp yumwan ono mér namp yéncép naenámpon.’¹⁹ Yumo Kwar te ankáránkamp támaonorá mér nap te, am támao saráp kwapwe kare nie? Am te kwatae yao-pwaerápao kor takrá mér napao maok, am fárákapao kor apáp tirínkrá kour me woukoura wae napon.²⁰ Yumo te épérép kare napon! Yumo kwapwe kare ninik fek tére moitea, Kwarén mér nap mwarriaka, yumo kwapwe kare ninik mént sámp moia te, yiráp mér nap te kánanke kwatae yak námpon. Ae te yumo te am kar fi mér mwarria nape?

21 Tak nap kwamp te, yumo wawenk. Wokwaek kar Kwaro nomp ounáp Abrahamo námokuráp táráp Aisakén Kwarén ofanámp sánk naeriaka alta mek pap naerianámp ninik táman nkea maok, man sérrá, ‘Amo te yae-párák kare aropono’ rimpon.
 ✧ 22 Yumo te fwapia ninikenke: Maomp mér te yae-párák kare ninik fek térerá yarak námpara, am takámp ninik ntia mér támao pwi yakámpon.
 23 Kwaromp Buk fekamp karao érik arakrá sénámpon, “Abrahamo Kwarén mér nánko maok, Kwaro man ‘Yae-párák kare arop’rá sérimpon.” (Am kar fi wae kare kar korop námpon.) Aeria maok, Abrahamén ‘Amo te onomp nouroupono’rá

✧ 2:21: Stt 22:9-12; Hi 11:17

sérimpon. ²⁴ Aeno yumo oukoumwan te wae mér napon: Arop Kwarén mér námp mwar yak námp te, Kwar te am aropan te ‘Yae-párák kare aropono’rá sér mo i konámpono. Aeno mao Kwarén mériaka, kwapwe kare niniként tére nánko te, Kwaro man ‘Yae-párák kare aropono’rá sénaenampon.

²⁵ Ae konámpara, kokopor yupu Rahapo kor Josua tirá kérépeakámp aropan yae-párák éréképá yakea ankwap mwae-párák tirá kérépámpantá maok, Kwaro man sérrá, ‘Amo te yae-párák kare yupuno’ rimpon. ✧ ²⁶ Nomo te wae méron: Waemp pourouk woukoupeyak mo námp te am te wae sumpwi yak námpon. Ae konámprám taknámpon arop Kwarén mwar mériaka yae-párák kare ninik fek tére mo námp te, maomp mérao kor arop sumpwi námpon niamp takeno.

3

Nomo ankár fwapia ninikrá sér mwanámpon kar

¹ Ononamp fákáre, Yumo ou mekamp kápaekare arop ‘Tisa tére mwar’ ria kikiank mwanape. Nánkár wakmwaek Kwaro koumteouráp aropan yurukup námpon fek te, porokwe fek yurukup naenampon. Aeno tisa nomwan yurukupria te, kar tokwae sénaenampon. ✧ ² Nomo ponankor kápaekare por kwapwe kare ninik mwarianámpon, ankwap ke fek tak mo i konámpon. Aeno arop ankárankao sénámpon kar kwatae mo, yae-párák kare námpon te, kwapwe kare aropara, námokuráp pourou ntia ninikan kor ponankor fwap poukeyak

✧ 2:25: Je 1:21; Hi 11:31 ✧ 3:1: Ap 20:28

naenámpón. ³ Arop fárákap te hosamp táp mek ain tákáre papea, paok tokorop tea, am fek samp-tankrá, mao akwap naerianámpaok akwapanoria te, paok fek níkir nánko, am mwaek me kor sirarrá akwap konámpono. ✧ ⁴ Yumo sipan kor ninikenke. Sip pourou te tokwaenono. Maomp stia te kánanke kwarokao maok, am sip ankwapmwaek akwapanoria te, kepteno am stia kánanke fek sámprá arákár nánko, am mwaek akwap konámpon. ⁵ Ae konámpnámpp taknámpp, top kor te pourouk yak námpp kánanke kwarokao maok, kar tokwae sérar i konámpono.

Nomo wae mér námpon: Yaomwi énti kánanke santukupea yopwar pounkouroup napo, yaomwi yurunka waeria yopwar wouroukoupa waeriaka, yaopwe fépérrá fékér i konámpono. ✧ ⁶ Top kor te yaomwi niamp takeno. Am te ankárank mwaek kiríkiri pourouk yak námppao maok, mao te kápae kare nkwakwe make ninik tirá kák nánko, pourou mekmwaek ponankor oupouroup konámpon. Me tokwae mekamp yaomwi touwe támao arop táp mek pounkouroup tenánko, am yaomwi támao aropamp paokop ponankor wouroukoumpia kwatae pap námpon. ✧ ⁷ Aropao wokwaek yao pwae mekamp fir wunria, kou, ant, tákam, tá nkwakwe make éntékam koupoumpea wunia taokeyakáp napo, am fárákapamp yae ankore mek yakáp i konap te, oukoumwan kor tak napon. ⁸ Ae konapan maok, arop ankwap ankárankamp te námokuráp top kor poukwap naenámp pourou mono. Nkwakwe make kar kwatae sérar námpp

✧ **3:3:** Sng 32:9 ✧ **3:5:** Snd 16:27; 26:20-21; Sng 73:8-9 ✧ **3:6:** Mt 15:18-19

te, am te fouao arop surumpwirá kák konámp niamp námpon. ✧ ⁹ Nomo te ankárankamp top kor fek táman anánkaopwe kar sér i konámpon. Ankwap ke fek Kwaromp e sakaprá, ‘Kwar te nomp Naropwar, nomp Tokwae Kar’rá sér. Tá ankwap ke fek Kwaro nomwan yoroiaka námoku niampí papnámp aropan nomo kar kwatae sérar i konámpon. ¹⁰ Kwaromp e sakapnap kar ntiaka toropok kar kwatae, anánkaopwe ankárankamp táp meknámp korop konámpon. Ononamp fi, am ninik te kwataeno. ✧ ¹¹ Ént me meknámp oukurnámp ént te, kwapwe kare ént, tá oukwe topnámp ént méntér oukur mo i konámpon. ¹² Ononamp fi, ae te kwantae te fwap ouwip tank naenámp nie? Ae te souwe te fwap kwantae ki tank naenámp nie? Ankár taknámp kwapwe kare ént te oukwe topnámp ént mek méntér korop mo i konámpon.

Kwapwe kare mér te Kwarompao ék námpon

¹³ Aeno yumonap mekamp arop ankárank ninik kouria mér kwapwe námp kwamp te, am arop te námokuráp ninik wampwe pwarará, yonkwae kour sámpea maok, yae-párak kare ninikaok yáakria, arop yaewour i konámp ninik fek tére nánko, arop fárakap nke mwanapon. ✧ ¹⁴ Aeno yumo arop ankwapan kokwarok tokwaeria, yumoku mwanapan saráp ninik i konap kwamp te, warákár-séri kwapono. Takria te, yumonap ninik támao kar kare apárok sámp-anámp mwanape. ¹⁵ Am take pourouráp mér te am te yámar meknámp ék mono. Am te

✧ **3:8:** Ro 3:13 ✧ **3:10:** Ef 4:29 ✧ **3:13:** Ef 4:1-2

apárokamp ninikono. Am ninik te wokwaekamp kwatae ninikan Satano naropwar nánkárápá yak námpono. ¹⁶ Am taknap arop ankwap fárákap te arop ankwapan kokwarokrá paokopria maok, ankwapan pwarará, námoku mwanapan saráp ninikrá paokopnap arop te fwapia tank mono, nkwakwe make kwatae ninik i konapon. ¹⁷ Aeno arop Kwaromp ninik kour kwapwe sámp nap am te arak i konapon: Manénkir te, yiki kor ninikaok paokop i konapon. Tá wakmwaek, arop ankwap fárákapént ankárankamp ninik fek paokopria, yonkwae porokwe fek yakápria, arop ankwapao sénap kar wawi konapon. Tá arop ankwapan aropompria yaewour. Aeria maok, ankárankamp puri fek arop ponankoran ninik i konapon. Am kwapwe kare ninikaok nap te, kwekár mono, ankár kare kar ampaok i konapon. ✧ ¹⁸ Arop fárákap aropao yoporrá yorowar napo, taki kwaponorá yonkwae porokwe pap nap te, am yonkwae porokwe ninik támao yopwar mek ankankou yoronámp niamp nánko, firaó karenámp niamp, aropamp paokop mek korop naenámp. ✧

4

‘Apárokamp ankankan warákár nap te Kwarén yopor naponó’rá sénámp kar

¹ Yumo ou mek yoporrá kar yorowar nap te, apae fi kor fek i konapon? Yumokuráp kikiank ninikao yakria maok, am támao nkwakwe make ankankantá kikiankrá, kar séraria maok, am fek

✧ **3:17:** Jop 28:28 ✧ **3:18:** Mt 5:9

táman youpoukwaprá yorowar i konapon. Am te kare nie? ✧ ² Yumo te ankank kikiank napao maok, sámp moria, am fek arop tirá wour i konapon. Yumo te ankank kikiank nap támao, yumo sámp moria yopor yonkwae pwarámprá yorowar i konapon. Yumo ankank sámp mwaria te, Kwarén sér mo i konapara, am fi kor fek táman yumo am ankank sámp mo i konapono. ³ Yumo am ankank sámp mwaria Kwarén kar toropwap napao, am ankank sámp mo nap fi kor te, yumo Kwarén kar toropwapnap ninik te kwapwe kare mo napara napon. Am te yumoku mwanapan saráp sámp mwaria kikiankria napara, am fi fek táman sámp mo napon. ✧ ⁴ Yumo Kwarén pwar nap te, yupuaó náráp poumarop pwar akwapea, kokoporrá yárok námp niampon. Ae te yumo aráte mér mori kwapon? Apárokamp ankankan kikiank nap te, yumo Kwarén yopornap arop fákáreno. ✧ ⁵ Kwaromp Buk fekamp kar te arakrá sénámpon: “Kwaro wokwaek nomp ninik mek Spirit papámpan, nomwan yonkwae touweriaka, námoku náráponoriaka kárákáre námpon.” Yumo má kar te kar mwar ritea nape? ✧

⁶ Aeno Kwar te nomwan aropomp tokwae konámpara, Kwaromp Buk fek kar arakrá sénámpon, “Arop námoku tokwae kar nampria waenámp arop te Kwaro man far-pwar konámpon. Aeno arop námokuráp e apárok anámpea porokwe feknámp aropan maok, aropomp i konámpon.” ✧ ⁷ Yumo te sánánkar porokwe fek yakápria, ankár

✧ **4:1:** Ga 5:17 ✧ **4:3:** Mt 6:9-13 ✧ **4:4:** 1 Jo 2:15 ✧ **4:5:** Mt 6:24 ✧ **4:6:** Jop 22:29; 1 Pi 5:5

Kwaro sénámpaok tukupria maok, yumo Satanén far-pwar napo, yumwan pwarará farákapá akwap naenámpon. ✧ ⁸ Yumo ankár Kwaromp wonae fik kar tukup napo maok, nopok Kwaro kor yiráp wonae fik korop naenámpon. Kwatae ninikráp arop yumo te yiráp kwatae ninik pwar napo, yiráp ninik te yae ént mek yárár napo, yiki kwapwe konámp niamp araknámp nae-námpon. Yumo anánkaopwe ninikráp arop, yumo te am yiráp ninik mek yaknámp kwatae ninik am te nkwampok tirá épéri pwar kipo. ⁹ Yumo te kwatae ninik fek paokop nap kwamp te am fek ninikriaka yonkwae touwea waeriaka ém tárae kip. Yumo oukoumwan amomoránk nap kwamp te, yumo te am amomoránk pwararea, yumo éménk kip. Yumo oukoumwan warákár nap kwamp te, am warákárap ninik te pwarará yonkwae touwea wae kipo. ¹⁰ Kwar Tokwaerao nke námp fek yumo te sánánkar porokwe fek yakáp napo, Kwar Tokwaerao yumwan e tokwae nénk naenámpon.

Kwaro saráp arop yurukup naenámp kar

¹¹ Ononamp fákáre, yiráp ankwapyaenápén kwatae napria wouroump-séri kwapono. Arop ankwapnápén wouroumpria, ‘Amo te kwatae naponó’rá sénámp te, maó te loan kor kwatae kar séria wouroumprá sénámpon. Táte amo am loan wouroumprá sénap te, amo te lo ankore mek yak monap arop niampono. Amo te arop yurukup i konap arop niamp napon. ¹² Kwar ankáránk námoku am lo pap námpara, námoku maok arop ponankor kotriaka yurukupia fákeyakrá, arop

✧ **4:7:** Ef 6:11-12; 1 Pi 5:8

ankwap fárákapan warko éréképria maok, arop ankwap fákáreran kwatae pap naenámpón. Ae naenámpara, amo te wa nap kwamp, arop ankwap fárákapan wouroumprá sénanapon? ✧

‘Nomokunámpaok paokopi kwapono’rá sénámp kar

¹³ Yumo arop ankwap fárákapa arakrá sér i konapono: ‘Oukoumwan, tá oumpouran arake fek, nomo ankwap taun mek tukupea ankárak yopwar fek bisnis téreaka mani kápae kare sámp mwar’ ri konapon. Ono yumwan sér rae, ¹⁴ “Yumo te mér mo napon, oumpouran te apae ankank korop kun. Yumo te yiki yakáp mwanap te mokop námpon? Yumo te yaomwi sourirao pokeaka fae tákáre ke fek yakea moyak konámpnámp taknámp mwarea napon.” ✧ ¹⁵ Aeno yumo te arakrá sér kipo: “Kwar Tokwaerao onan takaerianánko te, ono fwap yiki yakria am tére naerá niníknamp ankank takrá tére nanampon.” ✧ ¹⁶ Aeno yumo te yumokuráp niník fek ‘Námo tére tokwae namp’rá warákár-sérar i konapono. Am take pourouráp kwekáp niník te kwatae kareno. ¹⁷ Yumo fwapia niník kip: Arop kwapwe kare niník wae mér námpao, am niníkaok tére mo námp te, am arop Kwaro nke námp fek kwatae niník námpon.

5

Ankank kápaeráp arop fákáreramp kar

¹ Oukoumwan ono ankank kápaeráp arop yumwan sér rae: Yumo te nkwakwe make ankank

✧ **4:12:** Ro 2:1; 14:4 ✧ **4:14:** Lu 12:18-21 ✧ **4:15:** Ap 18:21

kwatae korop naerianámp aran niníkria éménkria fépénénka wae kipo. ² Yiráp ankank kápae kare te turupwiria, yiráp mopor i konap ankank te ponankor sárárao wae fépéri pwar námpono. ³ Yiráp mani gol ntiaka silva te sorok nánko, am mani támao yiráp kwatae niník érik farákár nánko, mao yiráp pourou ponankor yaomwinámp wouroukoup naenámpon. Oukoumwan wae pwarnámp yae wonae fik námpara, yumo maniráp ankank koupoukour nap te, kwaporok táman napon. ⁴ Yumo fwapia wawenke! Yiráp tére konap aropao yiráp yopwar mekamp fir tia koropea napo, yumo kwekáriaka, mani ponankor nénk moia, ankwapmwaek yumokuráp por pap konapono. Tá am ankwapmwaek pátenap mani támao yoporrá wumwi nánko, am tére arop fárákapamp wumwi karao kor Ponankor Kárákáre Tokwaeráp Tokwae Karamp woupwi mek akwap námpon. ⁵ Yumo mámá apárok yakáp nap fek warákaránk mwanap kokwapwe ankankan ti napon. Yumo fir tokwae fépérrá nununkwi nap te, bulmakauran tokwae kari yak nánko, yankop mwaria nánap nap niamp napon. ⁶ Yumo kwapwe kare aropan kotiaka ankank moráp arop arákarea pap napo, yumwan nopok am fek kar sér mo, wampwe kwaeria pwarará am fek sumpwi námpon. ✧

Kárákáre fek fokopeyakra Jisasén yépék mwanámp kar

⁷ Aenámpara, kémpiyae tárápu, yumo te ankár Kwar Tokwae Kar warko ék naenámpara, yépékria

✧ **5:6:** Wkp 24:15; Mt 6:19-21; Mk 4:19; 1 Ti 6:9-10

kárakáre fek yakáp kipo. Yumo te wae méron: Aropao noump nánko yopwar yoroia pwatea taokeyakáprá yépékrá tukupea, am fir kare nánko fári konapnámp taknámp mwanapon. ✧ ⁸ Kwar Tokwae warko ék naenámp yae te wae fápaé námpara, yumo kor ankár ninik kárakáre sámpea, sánánkar yakápria yépék kipo. ✧

⁹ Ononamp fákáre, yumo te yiráp ankwapyaenápén nonopok yoporrá e-poup sérari kwapon. Am tak nap fek te Jaso yumwan nopok touwe kwatae sánk naerámpon. Yumo fwapia wa kip: Jas ék naeria nánap námp te wae fae námpon. ✧ ¹⁰ Ononamp fákáre, yumo te fwapia nik kipo: Profet fákáreráo wokwaek kar Kwar Tokwaeramp e fek kar farákápapo, épérépnap aropao man nkwakwe make napo kuri, mao te kárakáre fek yae-párak kare yakápapon. Yumo kor am fárakapao takiap ninik táman sámpea mántwaok kipo. ✧ ¹¹ Nomo má kar te wae mér námpon: Manénkir farákápap arop te, nkwakwe make kar koropriaka touwe tokwae sámpria kor, kárakáre yakápiakapan, wakmwaek warákárapon. Yumo te Jopomp kar te wae wawiapon. Mao nkwakwe make ankank náráp pourouk koropámpan kor ninik kárakáre sámpea fokopeyakeanángo maok, nánkár wakwmwaek Kwar Tokwaerao man yaewouriaka yae-páraki papámpon. Am takimp te, yumo kor wae mér napon. Kwar Tokwae nomwan kor yonkwae touweria aropomp saráp yak konámpon. ✧

✧ **5:7:** Ga 6:9; Hi 10:36-37 ✧ **5:8:** Fl 4:5; 1 Te 3:12-13 ✧ **5:9:** 1 Ko 4:5 ✧ **5:10:** Mt 5:11-12 ✧ **5:11:** Jop 42:10-13; 1 Pi 2:19

Fou e sér i konámp kar

¹² Aeno ononamp fákáre, yumo fou e sér mwaria te, yámar mekamp ankankamp e, tá apárok mapekamp ankankamp e, tá ankwap ankankamp e fek kor fou e séri kwapono. Taki nap fek Kwaro yumwan nopok kot naeane. Moan nap kwamp, párák ‘Mono’rá sér, tá karenoria nap kwamp, ‘Yeno’rá sér kip. ✧

Kwapwe kare aropao Kwarén sénámp kar

¹³ Aeno yumo ankwapao nkwakwe make kar korop nángo te, mao te Kwarén kar toropwap kun. Tá ankwapao warákárámp kwamp te, tár kar sámpeaka, Kwaromp e sakap kun. ✧

¹⁴ Tá yumo ankwap ankáránk touwe sámpria te, siosén taokeyakáp konap aropan wumwi nángo maok, koropea Kwar Tokwaeramp e fek maomp pourouk wel papria maok, Kwarén ‘Man yaewourae’rá sér mwanapon. ¹⁵ Táte am fárákapao Kwarén mér nap fek kar toropwap napo te, Tokwae Karao am aropamp touwe fwapi pap naenámpono. Aeria mao kwatae ninik sámpá yak nángo te, Kwar Tokwaerao am kwatae ninik ponankor tirá épér naenámpon. ✧ ¹⁶ Ae naenámpara, yiráp kwatae ninik ankwapyaenápen nonopok érik farákápria maok, yumo Kwaro am fárákan yaewouranoria kar toropwap napo, Kwaro yumwan yaewouriaka yiráp touwe fwapi pap naenámpon. Yae-párák kare aropao Kwarén sénámp kar te kárákáre korara, arop ankwap fárákan fwapi yaewour naenámpon. ¹⁷ Elaija

✧ **5:12:** Mt 12:36 ✧ **5:13:** Sng 50:15; Kl 3:16 ✧ **5:15:** Snd 28:13; 1 Jo 1:9

te arop námoniamp makerao maok, Kwarén ‘Warákam sámp-kérép kwapono’ ria kárákáre fek sérimpon. Aenko, yinink yopwariaka tokwampok yunk máte warákam ék moi yakánko maok, ¹⁸ warko Kwarén kar toropwapánko, warákam ékria maok, yopwar mekamp fir yae-párák forokorimpon. ✧

Arop mwae pwar nánko, warámp mwanap kar

¹⁹ Ononamp fákáre, yumonap mekamp arop ankárankao Kwaromp kar kare pwararea, mwar mwae k yárák nánko, arop ankwapao man warko warámpea korop námp te, mao waeman kwapwe kare ninik námpon. ✧ ²⁰ Yumo te arakrá ninik kip: Arop kwatae mwae-párák akwapnám aropan warko Kwaronámpok warámp-sankorop námp te, maomp waemp te yaomwi mek akwap mono, Kwaro maomp kápae kare kwatae ninik tirá épéri námpon. ✧

✧ **5:18:** 1 Kin 17:1; 18:1,42,45 ✧ **5:19:** Mt 18:15; Ga 6:1 ✧ **5:20:** 1 Pi 4:8

Kwaromp Kwapwe Kare Kar
The New Testament in the Karkar-Yuri Language of
Papua New Guinea
Nupela Testamen long tokples Karkar-Yuri long
Niugini

Copyright © Wycliffe Bible Translators, Inc.

Language: Karkar-Yuri

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-01-09

PDF generated using Haiola and XeLaTeX on 11 Nov 2022 from source files dated 9 Oct 2020

7103f8db-88c2-5fec-8ac4-0edfac04e885